

每週經課朗誦經文（巴克禮台語漢字）2011/12/18

共同經課-1 撒母耳記下七章一節～十一節，十六節

1 當王踎佇厝內，耶和華也已經互伊脫離四圍的對敵，得著安靜的時。2 王給先知拿單講：「看啊，我踎佇柏香柴的厝內，總是上帝的櫃踎佇帳簾內。」3 拿單對王講：「見若你的心所想的通去做，因為耶和華及你佇啲。」4 彼暝，耶和華的話臨到拿單講：5 「你去給我的奴僕大衛講，耶和華按呢講：『你欲起厝互我倚起嗎？6 對我導以色列人出埃及的日到今仔日，我未曾踎佇厝裡，常常行佇布棚及會幕。7 見我及以色列人所行到的所在，豈曾對以色列一支派的士師，就是我命令照顧我的百姓以色列的講：恁啥事無給我起柏香柴的厝啊？』8 「今，你著給我的奴僕大衛，講萬軍的耶和華按呢講：『我對羊騮(tiâu)中，你啲趁羊群，揀你，做我的百姓以色列的君王。9 你無論去叨落，我常常及你佇啲，佇你的面前剪除你一切的對敵。我的確互你得著大名，親像世上許個偉人的大名一樣。10 我欲為著我的百姓以色列定著一個所在，栽培 in，互 in 踎佇家己的所在，無閣遷徙；兇惡的類無親像早前攪擾 in，11 也無親像對我命令士師管理我的百姓以色列的日。我欲互你脫離一切的對敵，得著安靜，閣耶和華給你講，耶和華欲給你建立家。16 你的家及你的國欲永遠建立佇你的面前。你的國位也欲堅固，到永遠。』」

共同經課-2 路加福音一章四十七節～五十五節

47 我的心尊敬主做大；我的神因為救我的上帝來歡喜；48 因為伊看顧奴婢的卑微；對今以後，萬世代欲講我有福氣。49 因為彼個有權能者，為著我做大的代誌；伊的名是聖。50 敬畏伊的人伊憐憫 in，到代代。51 伊曾用伊的手出氣力；心志驕傲的人伊有趕散 in。52 有權能的人伊搓(lut)in 的位，卑微的人伊升 in 做高；53 梘的人伊用好物互 in 食到飽，富的人伊互 in 空空倒去。54 伊扶助伊的奴僕以色列，55 來紀念憐憫，照伊對咱的祖所講的話，來施落互亞伯拉罕及伊的後裔到永世代。

共同經課-3 羅馬書十六章二十五～二十七節

25 上帝會堅固恁照我的福音，及所宣傳耶穌基督的事，也照永世代所隱密奧妙的闡明。26 此個奧妙此霎有著現，也對先知的冊，照永遠上帝的命令來指示萬邦，互 in 對信來順趁。27 願榮光對耶穌基督歸佇獨一有智慧的上帝，代代無息。阿們！

共同經課-4 路加福音一章二十六～三十八節

26 到六月日，天使加百列奉上帝所差到加利利一個城名叫拿撒勒，27 就近一個在室女，是已經配定著互大衛家的一人，名叫約瑟。此個在室女名叫馬利亞；28 天使入去，對伊講：「得著大恩的人啊，平安，主及你佇啲！」29 馬利亞不止印愕伊的話，想此個請安是甚麼意思。30 天使給伊講：「馬利亞啊，莫得驚！因為你得著上帝的恩典。31 今你欲懷孕生子，著給伊號名叫耶穌。32 伊欲做大，稱做至高者的子；主上帝欲用伊的祖大衛的位互伊。33 伊欲做王佇雅各的家，到代代；伊的國也無窮盡。」34 馬利亞對天使講：「我未有嫁人，怎樣欲有此個事？」35 天使應伊講：「聖神欲臨到你，至高者的權能欲致蔭你，所以對你生的欲稱做聖做上帝的子。36 閣你的親戚以利沙白，已經老也懷孕，平素稱做袂懷孕的，今有娠六月日啦。37 因為，上帝所講的話，無一句無力。」38 馬利亞講：「我是主的女婢，願照你的話應驗佇我。」天使就離開伊去。